

四庫全書

集部

欽定四庫全書

集部

靈巖集卷二

詳校官起居注主事臣顧宗泰  
主事臣呂雲棟覆勘

賸錄監生臣程廷璋

欽定四庫全書

集部四

提要

靈巖集八卷

別集類三 宋

臣等謹案靈巖集八卷宋唐士恥撰士恥爵

里始末諸書不載案金華志有靈巖山山有  
靈巖寺為梁劉孝標故宅其集以靈巖為名  
與山相合集中有兩溪詩據志即金華之激  
溪也則士恥當為金華人集中又有府判何

公行狀一首府判名松字伯固即金華何基  
之大父士恥之母為松女弟士恥又為松婿  
亦世籍金華之徵矣考金華諸唐自堯封首  
登紹興二年進士累官直龍圖閣朝散大夫  
子饒州教授仲溫樂平主簿仲義及知台州  
仲友並紹興中進士仲友復中宏詞科仲友  
三子名士俊士特士濟亦與何為姻姪見朱  
子案仲友第三狀集中通吉守史彌忠啓云

大父朝蹟之累年嘗在王國履簪之列先世  
符庶之昔日又聯金昆羈羈之遊上聯似指  
堯封為朝散時言下聯似指仲友知台州時  
言核其世系殆堯封之諸孫仲友之猶子特  
其或為仲溫之子或為仲義之子則不可得  
而詳耳其官階可考者集中有謝許南丞薦  
舉啓云僅以門調玷于士流又啓云曩緣北  
陰常領簿書通羅守啓云牽絲邑屬讞獄掾

曹又有交代張司理一啟其他簡牘率云冒  
綰理曹典司五聽知士恥以門叙入仕薦充  
改秩嘗任丞倅問刑之官其宦迹可考者曰  
吉州曰臨江曰建昌曰萬安知歷官皆在江  
右諸郡其文字紀年可考者上自嘉定下至  
淳祐知為寧宗理宗時人其他則集無明文  
莫得而稽矣集中制誥等作絕無除授姓名  
即表檄箴銘贊頌諸篇亦皆擬作其題自羲

軒以至漢唐間取北宋八朝與南渡初年時  
事考高宗立詞科凡十二題制詔誥表露布  
檄箴銘記贊頌序內雜出六題分為三場每場  
體制一古一今士恥所作蓋即備詞科之用也  
仲友曾著詞科雜錄其亦家學濡染世擅其  
長歟集久失傳非惟史不著錄即志乘亦不  
登其姓名故談藝諸家率不之及今從永樂  
大典內采輯次為八卷并其代人之作以類

附焉循誦其文洽聞殫見古澤斑然非南宋  
末流摻臆見騁空談者所能望其涯涘未可  
以其名不著而忽之也乾隆四十六年九月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

靈巖集卷一

宋 唐士心 撰

制

觀文殿學士特進授少保觀文殿大學士充萬  
壽觀使兼侍讀提舉祕書省制

門下晉左棘以貳公式重內祠之領峻廷恩而勸誦更  
提冊府之綱眷時舊弼之良夙畀文階之長方深資於  
殫洽宜特示於寵優咨爾在廷聽台作命具官某賦資

偉傑蘊識高明操履端方一出準繩之正見聞淹貫迄無毫髮之遺蚤由簡知寢即柄用攬天下惟幾之務自謨明而弼諧懋賢人可大之功每夙興而夜寐方藉謀猷之告乃崇廉退之方位表羣公職榮邃宇請勉從於慈逸禮未極於優嘉朕思謹守文必先師古雖羣經具在纂大法以昭垂然萬變靡常尚隨時而或異乃旁考百王之史亦洪敷列祖之謨參之四部之詳庶矣無窮之應惟論道經邦之素非說河畫符之虛成台切問之

仁假爾多榮之寵升華寅亮聿新命數之隆冠侍禁嚴  
益著精神之聚領壽宮而儀表奉列聖之衣冠與其共  
萬幾之繁是則恬一心之養式昭茂渥用廣多聞於戲  
皇祐邇英之臣嘗特咨於故老開元集賢之長亦亶命  
於舊人尚思殊寵之光益體詳延之意可特授

端明殿學士提舉江州太平興國宮授昭慶軍  
節度使知襄陽府京西南路安撫使制

門下建六纛以宣威允謂詩書之將總十連而作牧式

憑畿甸之封眷時祕殿之英久詔真祠之祿茲籌邊寄  
用屬仁人播告治朝亶孚羣聽具官其學為有用姿擅  
不羣錯節盤根惟若新硎之發輕車熟路曾何駿足之  
畱曩從甘泉繼翔琳館職號清閒之燕人思獻納之忠  
脫畧事為久焉均佚屈盤謀畧深用惜才維茲襄漢之  
區實迺疆陲之境匝賜履撫綏之地振輕裘容與之風  
允艱其人實遴于選乃開方面用釋恬居練穀旦以登  
壇指苔溪而錫鉞朱輪畫戟日凝燕寢之香絳節碧幢

霜凜元戎之乘式副兵民之寄共觀師帥之賢於戲方  
當靈臺偃伯之時散馬牛而橐弓矢應念峴首懷人之  
德安邊境而立功名勉續令猷往服休命

光山軍承宣使樞密副都承旨授寧武軍節度  
使領閭門事兼客省四方館事提舉皇城司制  
門下建旌旄而制闈式彰上閣之隆備次邸以肅賓併  
總周廬之重爰命蕃宣之寄久將宥密之言肆惟顯績  
之褒庸茂殊榮之寵我有渙號人其樂聞具官某允號

智囊恪持勁節精明莫及能俱畫於方圓動作有常殆不渝於尺寸蚤登名於勇爵既騰譽於壯年周旋奔奏之勞密勿樞機之命朕飭賓儀而增勢重禁旅以分權視書館以儲才九重辰共均殿巖而設儆萬雉天臨外嚴臚邸之修內肅爻間之俟是皆立政之所急宣其圖任之實難思得勇敢行義之人以兼先後禦侮之寄載酬英望用壯本朝繇固始以承流指閭中而出節新大纛高牙之建式歲軍容為九賓千列之光益嚴國體以

彰蕃錫以表精忠於戲漢謁者之亞二臺益恪司於嚴  
陛周宮正之比八次實祇戒於重門尚思畀付之不輕  
益勵肅共而無射

朝奉大夫給事中特授武康軍節度使簽書樞  
密院事制

門下授齋鍼以總戎爰秉六旄之重陟機庭而經武既  
聯兩地之崇睠惟青瑣之才猷佇倚紫樞之績效用假  
登壇之寵肆開專面之儀誕告治朝宣孚羣聽具官某

宏才勲烈厚德鎮浮不剛不柔坐致中和之福允文允武具全左右之宜頃居封駁之司存綽有飛騰之聲實茲遴心腹之選歷觀筆橐之班疇若可庸乃具有濟顧合登于廊廟爰晉處于機衡維今本兵之司儻漢太尉之列自唐代胚胎於名號至我朝備具於亞承元魁差一相之尊列屬亦貳公之重蓋房謀必俟如晦而決且裨創是基子產之成譬諸同濟之舟儼若相須之輔原興國簽書之制故事昭然比天禧畱後之秉新榮侈甚肆

出苕溪之節具頌英篤之華假武臣傑特之儀壯右地  
雄深之畧勉思異寵益展嘉猷於戲五大在庭爾既聯  
華於近輔七命賜國爾其專賞於干旌茂對寵光采爍  
忠力

龍圖閣直學士通直郎提舉佑神觀兼侍讀授  
昭慶軍節度使鎮江府駐劄御前諸軍都統制  
制

門下錫齋鍼以登壇爰易儀於武繫護將屯而列成用

恢畧於和門曉時延閣之英亟著通儒之望輟帝幙橫  
經之粹釋琳宮詔祿之優亶雄建於節旄肆寵綏於戎  
旅渙揚大號孚告庶工具官某策畧敏明器資淵詣擅  
晉室謝安之蘊施無不宜負漢廷賈誼之才學為有用  
維早都於聞望乃深簡於眷知且西清列閣之嚴既冠  
從臣之著而北門入說之重每須大道之陳優游京邑  
之珍臺恬養冲襟之素稟式方衰於寇運宜無怠於帝  
謨時維細柳之屯有在南徐之地烟清萬竈人飽習於

黃間風靜五旗令自嚴於青幙思得有勇知義之士以備折衝禦侮之方是用輶自禁廷易之右列出茗水遙班之節壯元戎先啟之行粵在咸平若水曾移于并野稽之慶厯韓琦首授於秦邦僅易廉車未隆明命茲煥白麻之寵將觀素學之施於戲越從南渡以來方啟備江之戍爰洎嗣興而後嘗掄舊將之門儻劔佩無間於兩塗則彝鼎俱傳於萬世

太尉昭慶軍節度使授開府儀同三司鎮東軍

節度使制

門下參揆路之班聯鼎新命綏尋將壇而告戒晉易節  
旄矟予尉府之雄夙護元戎之重茲焉進律儀以上公  
是為右列之榮宣布明廷之著具官某山西勁氣婁北  
英躔忠根厥心義方于外在山猛虎邊徼憚乎威聲當  
道老羣草木知其風概七禽七縱曾莫可為之敵百戰  
百勝幾無以書其功錯節屢更一心無撓漢鉞唐旌之  
夙秉呂韜黃畧之無加陟此上卿冠于右序閥星霜之

既久藹譽望以益隆是用異乎弁袞之流超厥儀華之  
錫九命加賜卷蓋高儼於面槐三台為天階亦仰符於  
拱極上吳興之故綏出越絕之新麾往服異榮日宣令  
聞於戲鄧騭創東都之典朕既殊顧遇之恩子儀久中  
令之班爾必勵恂忱之德前修可跂嗣寵何疑

鎮南軍節度使提舉江州太平興國宮授太尉  
    鎮南靖江軍節度使充醴泉觀使制

門下升尉府之華爰比崇於兩地疊將壇之拜用增壯

於六旄晉使領於殊庭奉班朝於禁里渙揚典冊孚告  
臣工具官某才紹三明智高七縱稟山西之勁氣援枹  
每念於忘身應婁北之英驪決勝有如於破的勲屢藏  
於盟府勇獨冠於和門公朝五使之階爾既躋於穹品  
版圖列等之鎮爾既度於常邦載咨均佚之優尚起念  
功之切儻吝褒嘉之意曷殚忠力之酬是用一開久曠  
之儀兩錫非常之寵惟烈祖肇新於勇爵漢公乃長於  
武階雖藩方卓建於高牙唐典或兼於賜鉞仍領豫章

之纛更頌桂管之麾啟冠號於琳宮為顯榮於弁列以  
疏異渥以重神京於戲自右而視左班比擬政鈞之隆  
貌因前而增後節此光制闡之舊儀益體朕心不忌予  
眷

少師昭慶軍節度使授太傅鎮東軍節度使制  
門下巍然公傳之崇跨班聯而峻陟魁若節旄之易新  
旌鉞以具頌瞻予寅亮之賢久亞範模之任升華一列  
加律巨藩用明顧遇之恩誕告縉紳之著具官某詩書

者產仁義襟懷華髮元龜綿國壽於箕翼細旃廣廈新  
帝典於効華屢廸謀謨愈隆聞望次三槐之論道卓冠  
孤卿先十乘以從戎夙開將模歲不同而月異德彌邵  
以年高且優游暇裕以自修益切磋琢磨而弗置屬予  
浩歎念爾難能官不備惟其人於今則可後所是著為  
令有典常新超周邦召保之居膺漢室卓公之任上吳  
興之錫綬護越絕以殷邦兩隆劍佩之儀高在疑丞之  
表往膺異渥采顯令猷於戲三夏享元侯朕既益隆於

禮貌九命加賜卷爾其尚勉於進修儻位極於羣臣亦君都於顯號

皇叔授光山軍節度使同知大宗正制

門下峻將壇而出節望式重於維城申王社以苴茅任  
載參於糾族有嘉季父夙翰皇家咨舊績於蕃宣錫新  
榮而董正渙敷丕號孚告庶工具官某懿毛畢之昭視  
間平之履身端行治自規圓而矩方學富問充若珠輝  
而璧潤屬承流於龍水益騰譽於金枝動惟法度之遵

蔚爾親賢之望朕酌成模於祖憲念歸報於文孫維景  
祐之設官思同倡於九族暨熙寧之報本益有嚴於大  
宗如麟趾以親親畫涇陽而世世茲恪遵於故事俾並  
對於寵光漢綏金佗爵遂超于庶姓周宗爪杖德有表  
于諸姬顧特重于委延庸采增於榮遇專制維城之間  
一新大纛之儀匪台爾私若古有訓於戲觀市垣二星  
之象朕唯謹於法天考本朝同姓之王爾尤光於襲爵  
往母忌於標的庶永賴於維持

皇叔祖光山軍承宣使提舉江州太平興國宮  
授昭慶軍節度使封安定郡王同知大宗正事

制

門下百世不遷之宗肆襲開於王社十乘啓行之旆爰  
申正於族盟迺賸宗藩最稱德齒式合追崇之典爰疏  
疊用之恩誕告外廷宣孚羣聽具官某溫良毓質肅哲  
褪身儼若成規不越準繩之外鏘然遠韻自諧律呂之  
和曩宣化於浮光益騰徽於令譽姑詔外祠之祿曲從

恬養之私朕嗣守不圖緬懷大業服藝祖開基之烈垂  
之萬年原熙寧襲封之規凜若一轍用疇同屬弗替宏  
模光映佗章畫涇陽而啓宇風生蘭卉聽族夏以保和  
雄我宗藩介之錫命指苕溪而出節練穀旦以登壇油  
戟前驅如授漢廷之鉞干旌顥賞有光唐將之牙以壯  
維城以隆繼世於戲爾從見於清廟有翼不祧爾待祠  
於陽郊式嚴升侑儻無忝於文祖庶以強於周家

誥

祕書監除中書舍人誥

勅朕恪承祖武庸謹政原維元豐六典之修備李唐兩  
掖之建萬幾可否太宰詔王內史又詔王列職顯榮三  
公曰府九卿亦曰府別掌紫微之誥他如青瑣之郎每  
難其人疇若予選具官某君子溫其如玉大雅卓爾不  
羣兼文學政事之科蔚為憚見中規矩準繩之度允謂  
端人夙儀則於清流久踐揚于華貫藹乎譽望簡在眷  
知曩魁祕館之英實表儲才之地弱水三萬里從容丈

室之仙冠者五六人涵泳石渠之澤粲壁府星辰之象  
舒木天日月之光兩兼清要之榮肆茂晉遷之寵翻階  
紅藥喜靄雨露之新起草黃麻聳聽風雷之厲儻朕命  
若絲綸之出則汝才式喉舌之宜

大同軍節度使提舉佑神觀除宣徽南院使誥  
勅亞樞府以疏榮式侍燕閒之地面使華而作冠聿新  
希闔之儀服其名當知承休將美之隆異其寵何必膺  
任界權之重輟汝殊庭之奉陪台清禁之游具官某肅

若禔躬凜然行義積糾旅董戎之效彰譽處於和門秉  
捐軀報主之忠著勤勞於弁列闕台淵慮為國盡臣雖  
高牙大纛之榮既出雲中之節而閒館珍臺之佚還為  
轂下之游乃未快于公言庸肆開於殊渥有居近密庇  
職宣揚維後唐崩號以來若閑寶兼官之重顧累朝用  
為成憲在儒臣尚謂曠恩遠追元祐復置之明夏為今  
日特異之寵益思朕眷永肩汝心

禮部侍郎除右散騎常侍誥

勅貳曹雖春官之最清要亦為具員吏掖省獨右貂之  
久闕欲以待非常人眷時獻納之英采著操修之粹與  
其助宗伯而舉明備之典孰若邇朕躬而加切磋之功  
庸新最密之聯期獲相觀之善具官某詩書襟度仁義  
步趨本乎冲遠之姿加以淵源之學肅雍四體超然大雅  
之不羣酬酢萬為湛若中局之止水蚤膺簡遇寢陟華  
塗左右夷宗既恪修於天秩周旋夔奏又迄致於人和  
高振名流綽有令譽朕念守文之不易欲求助已而未

遑苟獨學必至於寡聞且輔仁莫先於會友思近日新之德共成時敏之功是用輒從禮樂之司責以琢磨之義矧情文素接識前王易簡之心庶敷學相資闡異日中和之教尚勉修於厥職期有益於朕躬可特授

吏部尚書除參知政事誥

勅朕思謹萬幾任隆一相欲左右格天之業必高明識務之才資其佐貳之能助此經綸之志疇咨卿列擢與政鈞具官某溫其如玉之姿卓爾不羣之操居多錯節

庖丁之刀若新孔震巨撞大呂之律不替蚤上鶴行之地寢開鵬翮之霄權衡天下之人才紬繹胷中之國論能其小必能其大思之熟宜思之深用以彌縫造命之基庶亦據發通今之學原藝祖設官之意豈惟分趙普之權服太宗立賢之方適以養寇準之望尚益殫於志力期大用以登庸

給事中除翰林學士誥

勅朕思近忠嘉用裨政理雖羣英在列每殫獻納之勤

然一意會神莫如禁密之地益金炬尚容於卜夜而玉  
堂無過於代言事稀則心自優分切則情不隔當有從  
容之論裨于寡昧之思必也擇人庶乎獲助具官某學  
周經濟德稟溫純粹然瑚璉之姿叶以詩書之習徧更  
中外深著勤勞頃登青瑣之司蔚在紫荷之列外以彌  
綸於命令入焉罄竭於忠誠積有歲時是應褒擢加諸  
省掖寘在內廷前席賈生朕亦何翹於飢渴北門陸贊  
爾其具敷於腹心是將觀輔佐之才庶共底帝王之績

禮部侍郎除翰林學士誥

勅朕疇咨賢路思近正人維北門典策之官得南省詩書之彥庶以啟沃朕心之密亦將發據爾學之淵豈徒言語文字之間要亦疑丞輔弼之次具官某儒家望士俊選名流矧裴回閥閱之深且淹貫綱常之大禮樂殆非凡職實佐正卿典章固異他塗况居近列蔚若論思之譽闢予簡注之衷且陸贊膺唐帝之知志惟忠赤易簡被太宗之眷名在汗青蓋百僚莫切於是司宜多士

每欣於斯地殆亦六幕戚休之係兼一人非是之分其  
殫乃心毋負朕意

龍圖閣直學士中大夫提舉江州太平興國宮  
除端明殿學士提舉佑神觀兼侍讀同修國史

誥

勅朕率先惟謹學古是勤念中興三聖之規方圖約史而  
仰考百王之範頻御邇英思我俊髦叶于講繹改畀內  
祠之祿特輸祕殿之榮表在禁塗成此遜志具官某識

宏以達學博而明足溫純深潤之辭可以揚無前之偉  
績得厭飫優柔之理每能告多識之嘉謨頃躡夷庚備  
殫誠悃俄養恬於釐祝姑亞職於河圖有惕朕懷未究  
爾用矧堯舜相承之典加之神禹之謨且經史不同之  
言折之皇祖之訓萬世所仰眇躬是資蓋期二者之交  
修當究一心而無蘊比之聽履上星辰之峻孰若納牖  
增日月之明與其簪筆效朝夕之思寧如執簡鋪聖神  
之美優祥源之琳館與宿直於玉堂超職西廂升華北

殿懋乃講明之道宏予筆削之功往服殊休嗣班異渥  
朝奉大夫權知婺州除華文閣待制兼侍講兼

祕書監誥

勅祕書以省名崇儒也其長曰監昔所客焉今以寵爾  
徃敬朕命是為冊府有貳有丞有郎著作之庭校讎之  
部麟鳳集奎璧爛悉爾之屬固爾業履悉使聽順朕繫  
爾嘉然監之列下漢卿一等華文有閣祖訓是嚴命所  
論思四松有典閑暇之頃從容乎經惟帝憮之內上發

勛華之道周孔之思而斟酌乎祖道藏焉修焉息焉遊焉出入乎四部七畧厥掌不凡足為儒者之光爾來自名郡政務稔矣則必肅而通通而不紊爾勉之哉

左千牛衛大將軍婺州觀察使親衛大夫主管  
江州太平興國宮授監門衛大將軍湖州觀察  
使樞密副都承旨知閣門事主管皇城司誥

勅我朝設官名實相叶西樞之傳命朱閣之相儀與夫重門擊柝之重寶為密近朕不輕畀今交命爾爾其勉

哉有掌甚奧宜其削去常階正廉車之任而升環尹之  
華以重爾選傳命則肅且給相儀則無不協萬雉之嚴  
又屹其九天之上八屯無譁則所以明陟者斯不濫矣  
察訪之列視文臣之論思階政未去則瞠若也茲焉真  
畀厥禮匪輕往思爾職毋替朕命

權吏部尚書落權字誥

勅朕恪繩祖武庸勵官修重名器而為之方明差次以  
漸其進維元祐制六官之長不為一等之文若西都守

京兆之卿未即真居之秩俟其積聞被以寵光具官某  
學博以才通器周而用利盤根錯節曾何頓刃之難大  
呂黃鐘每見闔聲之肆歷更中外采著勤勞頃試天官  
實持銓柄心如止水物無遁形朝夕論思莫匪忠嘉之  
道羽儀禁從實為偉特之姿用進律以仍居蓋因能而  
專任升華而冠筆橐秉公以蒞權衡首漢廷九列之嚴  
表周家六典之重期殫獻納益罄謀謨謨

詔

誠諭守令勸學詔

勅門下朕永惟事統祈進民心迪烈祖之宏模蒞橋門而首善師禮恪修於先聖俾知崇儒重道之方古文爰發於上庠以暢尊經務學之化矧是一時之異渥又惟創見於前聞豈徒聲音笑貌之為蓋急漸摩涵養之倡至於出日罔不承風載惟國家積累之基每切郡縣布宣之意儒範必資於名俊學宮偏逮於遐陬雖其百里之微亦罔一毫之間尚慮未明於深旨儻焉有忽於彝

章或室宇庳陋而無更造之心或生徒寂寥而蔑詳延  
之禮弦歌俎豆漫隨沒於草萊期會簿書第殫勞於鹽  
米吏苟若此朕何望焉繼自今毋貳爾心勿替厥德以  
教養表率為大務以因循苟簡為深尤勉思風厲之方  
我有褒嘉之典其或罔悛前失曲護昨非青衿儻轉而  
上聞丹筆難從於末減邦刑無赦汝悔何追更賴持節  
觀風之臣密幾固愚方命之輩故茲詔示想宜知悉

誠諭監司守令務息盜賊詔

勅門下朕聞民生有性稟之於天未嘗不善然盜賊之興時乃間見何哉蓋衣食之迫切饑寒之交至恒心豈能終存拊安田里非監司太守與夫縣令之職乎一同千里十連之衆苟吾有以全安之則潢池之盜誰其忍之哉朕殫竭此心每願膏澤之而九重之遠何啻萬里捍焉其難決也輕爾繇賦薄爾征取去其盜竊息其訟爭一事有底而民之被夫德者深矣從此有陟厲此有罰朕必行之爾其毋忽各宣爾力勿廢朕言故茲詔示

想宜知悉

求遺書詔

勅門下朕右文稽古執道御今惟造字畫卦以來實繁載籍至開元集賢之日有光前人惜其冠燭之踵生乃爾焚散之殆盡惟我宋聖神之繼作每隨時錄冊之肆求洎文風日盛於八紘蓋書府歲增於四部亶中興既從而復古在沖人盍務於搜遺若孔壁奇文之藏或汲冢紀年之祕格之常典斯謂異聞至於九鼎之形模殆

亦六經之鼓吹庶有補於稽監時亦備於討論罔間幽  
微悉思包括四海博雅之士六幕淹談之人毋惟私藏  
副我誠意其為賞募則具科條故茲詔諭想宜知悉

戒令文臣侍從以上武臣管軍都統制各舉將

才不問親屬詔

勅門下朕嘗聞惟蕭何知韓信之賢惟鄧禹識寇恂之  
彥允茲兩漢之興實出二臣之力惟謝安石不遺於近  
戚惟范仲淹一洗於罪夷蔚為在昔之良規抑亦當今

之善監蓋可用者要為難得而灼知者必務兼收朕念無平不陂之艱務思患預防之實顧士卒既從於和叶然統臨尤藉於梟雄惟賢知賢以類求類凡我甘泉之法從及夫鶻弁之魁才其殫乃心毋負朕志昔臯謨每嘆其難事而宣尼嘗勉於爾知必陳選擇之方用作蒐求之據或善御衆而多多益辦或足智術而凜凜莫干得人心則如冬日之溫能出令則若秋霜之肅下至舉旗之勇悉歸舉目之綱雖武皇泛駕之云包含亦至抑

祁老舉親之善疑隙何生庶終得於真才用肆開於賢路故茲明諭想宜知悉

戒令監司守臣條具州縣民間利病詔

勅門下朕以眇躬托于士民之上眷惟萬緒極彼閭閻之間不見是圖無遠弗届思欲輕徭薄賦息訟省刑民俗知向而俊乂衆多吏道永清而廉隅振舉文武有並用之術上下無不通之情旁逮百為悉歸至當庶底三登之樂大開億世之基顧端居九重之深曷周知四海

之廣為究庶邦之正以參一道之中凡爾賜履持節之  
臣洎于剖竹專城之守耳目所熟接念慮之素經或拘  
於成法而未適其變通或隔於隱鄙而莫為之道違凡  
保衆安邦之術洎立經陳紀之方罔間細微悉歸搜討  
朕將闡大公之路開衆正之門先民有言詢于芻蕘况  
秉六條之詔皇極之稽謀及士庶矧膺千里之權其殫  
乃心以輔台志故茲詔示想宜知悉

誠諭中外之臣毋私薦舉詔

勅門下朕惟九州四海之廣庶員列職之繁凡升沉進  
退之攸分必能否賢愚之皆當極彼萬緒疚予一心在  
昔前王獨繇府署顧末流不勝其弊至國朝遂析其權  
天官持守法之司命秩視薦員之數若乃升名通籍脫  
選侍郎必先部使者之鶻書以及郡太守之判奏至京  
師具僚之外亦長官歲舉之稽行之有年通乃不倦矧  
若中人之嗜利至於私謁之成風嘗憫積勞特恢數路  
彼李唐進士之試有蒼姬里選之風維多覓舉之姦妄

徇糊名之制施之既久咸謂至平然事揚非比於言揚人弊豈關於法弊恒予中慮寓此明綸凡汝輔弼侍從之臣膺朕心膂耳目之選莫匪探誠而深倚豈應小節之未公安世不謝之心祁老舉仇之事極于中外一以準繩至於視察從違修明倡率愈謹正邪之辨兼持賞罰之方朕必勉為汝母後悔故茲詔示想宜知悉

靈巖集卷一

靈巖集卷一考證

第七頁前七行 醴泉觀使原本觀字下多察字今據

宋史刪正

欽定四庫全書

卷一

卷一

欽定四庫全書

靈巖集卷二

宋 唐士恥 撰

表

瑞慶節賀表

衍十二葉之休慶乾坤而震育永億萬年之命壽箕翼  
以天長時協令辰歡均率土恭惟皇帝陛下祥鍾九祐  
德冠百王接堯舜禹之傳更成湯之親受兼天地人之大  
實鉅聖之間生茂對昌期仍躋極治五百里蠻五百里

蔡將壹歸仁壽之區八千歲春八千歲秋殆莫比靈長  
之厯臣叨分符寄莫與嵩呼想麗日卿雲若仁祖稱觴  
之旦惟泰山神鼎陋廣成修已之年

賀冬至表

新甲子之厯載兆陽和占斗牛之躔既更日度無窮福  
履四溢寰區恭惟皇帝陛下育物對時與天合德神惟  
不測自然一氣之循周心本好生尤重初爻之來復土  
圭景測玉琯灰通登靈臺以書莫匪太平之象吹黃鍾

之律灼知有道之朝臣一障叨乘三呼莫與分化國之  
照漸增晉晝之明受圓丘之釐益迓乾亨之長

賀梟斬吳曦表

某月某日伏覩進奏院云云者聖神廣運大振當天妖  
惡伏辜曾不累月同文胥慶奕廟增嚴恭惟皇帝陛下  
德合九乾統承千歲如川方至十二葉之靈長猶日正  
中億萬年之珍貢宜茲叛渙亟焉剪除不煩兵甲之陳  
大致旃裘之震臣欣聞馘獻莫尾慶聯夜瞻井絡之區

頓明乾度朝誦雞竿之令一正坤維

代真里富貢方物表

葵心北戶久懷航海之誠象譯南琛初上職方之奏卑輸  
誠于蠻蠻實慕義于衣冠臣中謝竊以興國悅渤泥之  
朝嘉其始至祥符偉注輦之貢歎彼未來豈期從古之  
戴益忽玷當今之同軌伏念臣每以滄溟之中阻姑為  
吉蔑之附庸下極熒煌莫記星霜之變斷根膏馥第形  
賈舶之編既弗登夏王山海之經亦莫與汲冢會同之

解且西鄰驃國尚効德宗鼓舞之懼而南境閭婆每續  
元嘉職貢之敬退念陋邦之蕞爾獨為大節之闕然臣  
是敢遙起三呼恭馳一介隨貫月乘槎之侶占迎秋從  
律之風效牽式啟于旄頭任土仰干於祿幣其德天合  
其明日合宜譯鞮象寄之悉歸大秦寶多大宛馬多想  
禮樂詩書之甚盛祈殿古人之委賜與榮玉版之詩書  
形容駭師古之圖道里續賈耽之志恭惟皇帝陛下離  
明繼照乾健統天中國有至仁自然篤近而舉遠小邦

懷其德豈徒厚往而薄來乃至微臣亦知大義法乎三  
聖矧更出於親傳令彼四方自式歌于來享其空懷辰  
共莫與躬朝嗣屬國之封章自今以始聳陪臣之復命  
其教可知

貢土物表

正會休期敢後萬方之集爻闔式貢庸昭八熟之祥遙  
睇紫宸仰干祿幣恭惟皇帝陛下接千歲之統閱四海  
之圖酌祖丕承壹用元豐之名籍深仁薄取既殊大禹

之組纁其益無方時偕行不貴異物民乃足臣叨符江  
國效禮職方川浴車盈頰叶氣致干之應銖積寸累見  
小人向上之心

代守臣賀改元嘉定表

聖神御極三周再閏之年政治更端四揭一元之號祥  
風所布化日以新竊以漢文未表於歲時猶改後元之  
號武帝欲明於正朔遂標登封之年皆通變以隨時宜  
更張而蠱飭矧慶元慕文聲之盛而嘉泰著代郎之隆

洎乎開禧揭若日月屬茲解絃之旦新乎紀歷之名誕  
布絲綸徧翔寓縣采詩書之遺訓慕殷周之盛王將見  
麟之德鳳之輝百嘉順集有如川之增山之壽一德  
尊臨名與實俱人因天定恭惟皇帝陛下明明在上赫  
赫當陽四三王之仁茂中興七紀之業五泰元之策迓  
升平再登之年茲革故而鼎新益泰來而否往書標嗣  
歲爰冠美名臣圭璧叨分風雷竦聽斗杓初指覺星宿  
之倍明日御欽承洎子男而如一

代安定郡王以下賀宗學落成表

教被宗枝創建親師之宇事勤工正迄新遜業之宮九  
廟增嚴八方仰德竊以小侯立學僅成戚畹之良資二  
館育材未淑潢流之遠派歷選前王之故莫如我后之  
朝繫人有生受天一理然教化乃聖所任而仁義非學  
不充凡自后夔教胄子之餘以及司樂掌成均之後莫  
急愛親之義孰知崇理之方故間平為豪傑之才而漢  
唐多宗室之過今茲肇立亶為創聞茲蓋伏遇皇帝陛下

下道際三王仁先九族雖大禹卑宮之儉每切謙讓然周家以宗之強獨惟汲汲識頤養為家人之要知菁莪乃麟趾之基謂金枝玉葉追琢之是先而鳥革翬飛鳩僕之當急茲訓百孫之屬俾知六籍之依齊家乃治國之先灼知原委修道實正心之要首及本支臣等忝居託附之親實被生成之澤迪師友相先之效期盡為君子之歸全天地不及之功將廣沐聖人之化

代婺州守臣進甘露圖表

臣某言盛德昭天允格飛甘之露泰和薄海適臨湏女之  
區敢因繪事之成用贊史臣之紀竊以唐官品瑞蓋齊  
等于卿雲漢世標年亦聯華于威鳳足以表升平之協  
應故每為前牒之特書維吾皇臨御以來多至治休嘉  
之獲不祧祖廟嘗瞻三秀之芝切近日畿且見屢成之  
璽雖為叶氣未極偉聞尚由動植之微盡顯覆臨之感  
獨此至味敵醴泉之美晶華占夏晝之長被草木以生  
輝駭觀瞻之創見敢藉丹青之毫末用撫萬一之形容

庶闢斧辰之嚴小借前旒之啟恭惟皇帝陛下紀元四  
號授筭六禋湛恩洋溢于八隅深仁厚澤洪覆歡歆于  
一德異瑞殊祥宜其有道之符著在無虞之世臣適當  
假守親覲自天書玉板之端喜姓名之亦預信蘿圖之  
卜與上下以同流

代守臣謝宣賜嘉定十年統天具注厯表

嘉靖殷邦十見星霜之易承宣漢郡一蒙正朔之加班  
春恪奉於王春授日必從於卿日竊以洛書協紀一被

周疆舜歷在躬四敷禹迹維是當天之統必歸乃聖之  
君矧我一王之興將及二星之數念往時之更化既四  
閏以標年雖巧厯莫窮殆如川之方至而象魏咸覩又  
見月之始和太史之謹攸司靈臺之占厥氣奉天弗後  
應序罔差繩繩氣朔之兩全井井歲年之各得旁協九  
農之務不聞毫髮之訛下厚庶民之生舉無動作之忒  
乃肆班於郡國以式順於陰陽雖在遐陬亦霑隆施茲  
蓋伏遇皇帝陛下對時育物以道御民欲設施不背於

惄舒故命官而推步欲惠澤咸周於遐邇故作厯以班  
宣致茲王政之占天亦俾侯邦之得序密清臺之課日  
月合璧星如連珠分方國之書朔南暨教東漸于海臣  
敢不恪遵成度廣訓黎民使作訛成易之方靡有失時  
之事俾忠厚鴻龐之賜舉霑成物之恩

代翰林學士謝賜唐五臣注文選表

禁直九天方負非才之愧善文衆傳遽叨榮賜之恩示  
其斧藻之淵源兼以蟲魚之訓詁竊以漢嘉王景之績

賜以禹貢之圖唐旌大亮之言班之荀悅之紀皆因人  
而示教使勉學以加思矧蕭梁帝子之英極楚些詞源  
之邃高艷盡窺於前作殘膏遠丐於後來開元之士五  
人李善之注一變儻曰雕龍之客爭先文豹之班臣筆  
札尋常言辭魯鈍誤獲寶宸之眷俾從玉禁之游絕無  
黃絹之好辭少稱白麻之明命自顧才殊於八斗焉能  
筆掃於千人惟茲傑製以偉編加以明言而衆見俯矜  
愚分簡在皇心恭惟皇帝陛下時御六龍曲成萬物念

內制尤多於體裁獨斯文稍具於條疏示以規模廸之  
種績臣敢不悉心勉勵仰德高深若杜陵訓子之詩務  
加精熟誦曲禮拜君之賜敢後服乘

代中書舍人謝賜金帶表

臣某言伏蒙聖恩賜臣金帶者綸省庸虛方負非才之  
愧身章粲爛遽蒙超等之恩深慙小已之私不稱匪頌  
之重臣中謝臣竊嘗觀國家御下之法識器服藏禮之  
端不著多儀各為一等惟是致身紅藥之省接武紫荷

之聯雖既與漢廷九列之崇然未兼唐官三品之飾必  
有非常之勝乃膺特異之頌歷誦前聞備諳故實長春  
釀賚僅傳開寶之年大筆簡知間見祥符之歲斯謂闇  
希之典以待英傑之流如臣志乏精堅質非渾厚居而  
強學鑄莫遂於顏淵出以事君礪深慙於傅說濫陪閨  
彥誤入化錘鳳沼判花寧有同心之斷彤庭書命終無  
擲地之聲忽拜誤恩莫安揣分隨班中諫驚改觀於常  
儀侍省夕郎歎均榮於兩掖靖惟么麼盍此叨踰茲蓋伏

遇皇帝陛下龍德正中鴻慈溥博歷觀周道獨先馭幸  
之恩度越漢皇粗見解衣之惠每異儒冠之顧誤深愚  
分之憐傑閣肇新昔既述寶元之榜垂魚僅錫今更踰  
李絳之榮臣敢不鏤骨銘恩書紳圖報服而拜賜知眷  
逮之殊常束以立朝誓身捐而不顧

代提舉實錄院進修孝宗皇帝實錄表

臣某等言業紹中興丕赫三登之化道光載嗣聿編九  
閏之年鋪張信史之成密勿嚴宸之覲竊以本書嚴於

大漢蓋祖春秋之規實錄顯於有唐每先紀傳之作矧  
上聖重華之盛屬神孫述事之明粲然累牘以成編爛  
若有光於邃昔恭惟孝宗皇帝心傳堯道治廣文聲勵  
精臨照之初抗意恢張之表法度彰禮樂著初無革故  
之勞天地觀日月明自有鼎新之效蒐羅俊乂不拘於  
常法修舉刑政振起其大綱仁以撫民而勤恤於至微  
義以整兵而必期於可用罷臺之儉無乎不服太阿之  
柄久而益神凡金匱石室之祕藏追壁簡科文之未見

屬重明之出治監成憲以欽承旁招副墨之莫共探汗  
青之粹根本著廷之作網羅私室之遺旁談百度之變  
通下逮諸臣之履效月繫時繫以年繫慶厯數之無窮  
特書大書不一書歎形容之莫盡用著不刊之典永貽  
罔極之傳茲虔卜以丁辰庸上闢於乙覽文從椒掖陋  
漢注之無端禮備寶藏與舜華而密映文輝九廟森護  
萬靈恭惟皇帝陛下離照當天乾剛御極綠車慶侍昔  
已造於精微丹史備書今聿加於潤色致茲鉅典粲在

明時溢文治於聯編有繼東都之盛仰湯孫於奕世愈揚前烈之光臣等獲際昌期幸窺丕範於萬年而繩武采彰紹述之勤作一藝以襲經豈有編摩之力

代右丞相謝賜御書說命中篇表

淵衷遠覽期取監於商書帝藻特頒俾勉希於前哲俯慙愚分莫稱寵光竊以世祖之頌細書徒風行於勤約文皇之賜飛白僅意屬於股肱未有探往行於前經示聖心於俯貢事光邃昔道覺後知仰惟商室之繼興無若高宗之

最盛誠通天地發於精祲之交道際乾坤著在便蕃之命  
矧是中篇之告后尤為異代之良規惟聰明必在於憲天  
惟治亂每生於庶士謙謹罔容於有善豫防當戒於不虞  
蓋巨賢上智之明謨亦平世持盈之要論此忠嘉之所屬  
當由俊傑以能然如臣叨任棟隆包羞鼎養雖累年更厯  
粗知保治之甚難而一意贊襄每冀謁誠之有補曾謂寶  
跗之灑俾知前哲之修茲蓋伏遇皇帝陛下離照當天乾  
剛御極法宮親事曾無自聖之心肆筆成書大闡不言之

啟發碩輔進王之簡開小臣趨善之門臣敢不厲志奉  
承伏膺啟沃先生鄙屋駭奪目於驪珠思濟巨川願悉  
心於龜鑒

代童子謝祕書省讀書表

臣某言伏蒙聖慈令臣祕書省讀書者弭年觀國慙非  
早慧之才明綺疏恩俾誦祕藏之簡欲具有造開以多  
聞臣某仰咸平邵煥之恩洎景德晏殊之澤端我寢昌  
之旦讀乎未見之書如臣者不善養蒙焉能求益寧有

百藥誦鄭子之博初無甘羅悟不韋之奇曾謂誤恩俾  
從藏室遠發中經之奧近窺肆筆之成青裾朝拜於木  
公朱錦夕榮於藜照連珍羣玉接采九鵠恩重孔門將  
終保互鄉之往事如東觀蓋上追黃香之游超凌尾弱  
水之蜚優渥過舞雩之詠茲蓋伏遇皇帝陛下與參化  
育樂長人材念愚衷蚤慕於簡編故遠慮欲培其芽蘖  
致茲瑣薄獲此叨踰臣敢不周覽瑰奇旁蒐隱奧鹽鷁  
陋見殆未免金根之譏管豹竊窺烏能及羽字之正

露布

擬河北宣撫使平貝州露布

臣彥博等言四海無波共樂漸仁之化一夫不軌空懷  
負固之心雖三軍之律至勤貳政之臣然六旬之叛不  
出孤城之守迄絕纖毫之援適彰宗社之靈蓋羣黎爭  
父母之歸寧小醜遂豕蛇之食用正鯨鯢之戮莫逃斧  
鉞之誅國家大業無疆重明四葉書同文車同軌恩波  
匝雨露之滋仁也柔義也剛政理若日星之照曾何狂

卒敢啓亂心本饑年流落之餘旁緣戎旅倚世俗妖訛  
之謬誑誘羣愚下胥兩協其偽謀本計旁連于鄰地斷  
浮梁而擅河朔由正旦以嘯狐狸惟天網之難逃乃賊  
徒之自露倉皇無策狼狽圖全刦庫兵而囚守臣僭王  
號而易正朔致茲叛渙達于聽聞陛下奮發乾剛昭明  
師律環鼓旗而肆擊屬樓櫓之素堅既築拒闌乃見焚  
于秉火或為內應復中阻于專攻尚稽膾縷之誅用急  
焦勞之顧謂蕞焉小壘曾閱月之未夷而密彼邊疆可

頓兵而不戰臣忠懷裴度憤切有苗願膺專閫之權俾  
效捐軀之分皇皇列纛蔚為啓乘之光烈烈中權得遂  
從宜之便謀攻九地誤敵多方設伏西門俾隻輪而不  
反擣虛南壘信妙算之無遺既致戮于守陴亦固圉而  
拒戰衛社忽興于蛇槊倒戈乃出于火牛尚逃遁以求  
生俄係累而就死檻車致命正天街九市之誅鶴唳聞  
風震磧漠八荒之族一寧邊徼四赫皇靈迄無纖粟之  
虞益固迓衡之業斯皆皇帝陛下深仁無敵至健自強

在齊民疾痛之微悉闢淵慮當邊塞喉衿之要敢緩天  
誅役不淹時戮惟元醜占騰祥于析木星宿倍明息祚  
革以橐弓鞬裘自聳臣等無任慶快激切之至謹遣某  
官奉露布以聞

擬權熙河經畧使禽蕃賊首領露布

尚書兵部臣某言屢虔邊徼既成怒臂之無知小效天  
戈竟破狡謀之三窟蓋違理者神人之共憤而背道者  
明聖之不容旁驚夷裔之心上釋裕陵之怒國家當天

七葉享祚百年益子視于多方亦海涵于萬寓朔南暨  
乎聲教初無遐邇之分仁義極其漸摩敢緩凶殘之取  
蠹茲小醜恃彼孱心跳梁躡躅者久之於邑恚忿者衆  
矣語其最巨斯謂臣容陷我一城仆其魁武募賞嘗聞  
於先世圖維敢啟于陰謀輒連平夏之師竟指臨洮之域  
版築大興于力役干戈擬逞于雄心謂合謀并勢以俱  
來庶封豕長蛇之荐食然淵謀廟算之所出知接手就  
縛之無疑一介朝馳了了目中之敵三單夕起明明間

外之權左右手知兩將之和赤白旆皆萬人之勇一鼓有同于拉朽四奔盡殪于臨流僥如莫假于游蒐孟獲竟從于生獻盡破他酋之胆合騰北闕之章冷風極青海之遙赫日破鬼區之暗且始謀之不善意并舉之難當揣其私心料彼愚見謂寡固不可敵衆詭姦計之萬全然天定亦能勝人奈雄圖之自濟出其不測成此非常斯皆兩宮深仁上格于皇天得道每形于多助不從中制惟責成功先人奪心賴合謀之竟售以少勝衆喜

四塞之盡清下叶雋功詎逃大戮

擬荆南路宣撫使平儂智高露布

臣青等言女側陸梁卒致漢師之討盧循猖獗難逃晉室之誅蠭爾蠻誕毒茲南紀央央隼旆啓十乘之元戎烈牙璋畀萬踐之突騎亟清嶺表誕布王靈國家子視民編天臨裔服朔南暨乎聲教初無遐邇之分仁義極其漸摩敢緩凶殘之取矧在靈旗之指曾何前敵之畱王則負固于一城旋歸授首元昊藉資于累世卒

亦來臣茲焉蜂蠻之失防赫若鷹揚而奮擊醜爾智高之  
虜桀焉交阯之藩偶稽梟獍之烹輒肆螳螂之怒象琛底  
貢期借助于中華狼子野心竟不逃于明見竊攘山澤  
招納逋逃陰含短蜮之姦欲肆長蛇之食誦其衆以焚  
巢之酷紹吾邊以告糴之虛忽竟下于鬱江乃亟戍于  
邕管遂張皇于虐燄亦僭擬于尊稱正朔建其偽名官  
號比之上國偏屬升平之久少忌豫備之修連破堅城  
痛吾民之塗炭進圍廣府期彼志之滔天賴金湯有不

拔之堅然雷電乏無前之掃偕忠殞于非命畋修望而  
退兵擁子女以謹歸縱火炎而肆暴赫乾剛之奮發奉  
師律以虔劉六纛風生先斬罔功之將三軍股栗盡輸  
赴敵之心將奪險以疾趨反戒糧而示緩果昧必爭之  
地斗臨不測之兵鬼喪冤驚遂倉皇而送死旗當鼓接  
猶跳躡以求生麾精騎以互馳束飛矛而莫逞威如破  
竹膽落聞風既夜遁于渠魁遂朝清于截海釋囚復業  
頓還百縣之農桑折馘數功爰及萬人之京觀交震雕

題之俗增明星紀之纏斯皆皇帝陛下默秉廟謨獨操  
睿斷念何辜于黔首乃墮兵鋒運無敵之神機亟清妖  
祲勝惟一鼓衆不三單屹銅柱于南陲永作地維之鎮  
聳葵心于北戶愈虔日禱之瞻

擬川陝招安捉賊平王均露布

尚書兵部臣有終等言小校何知遽受羣愚之迫神威所  
蒞定無天討之稽矧維羸肱決射之徒乃有背上忘恩之  
事是之可忍毋乃太荒國家並用剛柔初無吐茹仁義四

漸于六幕賞刑迭出于萬幾况茲効命以莊金要在秉忠  
而知禮凡服飾鞬橐之末洎炙漿飲勞之微何足動心乃  
敢倡亂縱馬轡以售姦計戮主將而成凶謀奔惶符節之  
臣創易歲年之號竟屠漢壘亟走劔門賴天險之難圖  
阻兵端之將逞屬上聞于事緒爰申命于鼓旗清壇有  
助順之師一戰幾顯庸之錄邛蜀莫窺于城壁嘉眉大  
合于干戈叢然假息于頃時昧若逃竄于萬死開門偽  
遁希小挫于銳鋒緣堞竟全姑畧從于養力離其脅誘

靜此氛塵連收再勝之功游達九重之奏數道爭飛于  
矢石孱然猶事于宴歌炎火一施敵樓隨盡示之生理  
庶此全功雖贊夫懷悔禍之心奈狡者繫首丘之念竟  
焚名竒莫效降幡甚雨淋漓顧未遂先登之勇壯夫感  
慨竟誰為難犯之鋒共知瞬息之危猶冀遷延之福力  
焉卷戰樂矣烏聲一夜沈沈覺紛孥之頓肅蜀江渺渺  
知倉卒之弗航竟從醉飽之餘殲作梟夷之伏斯皆皇  
帝陛下聖神廣御文武兼施萬里鼠偷竟不逃於明見

三單鷙擊終無敵于奇兵迄平井絡之區益茂蘿圖之業

擬熙河經畧使復洮河露布

尚書兵部臣某言斷匈奴之臂漢家綽有淵謀守四鎮之城唐帝亦推上策所以殺羌夷之勢使之無侵軼之虞蓋兵家萬全之圖關人主九重之畫國家深仁同視大業無疆英明特起于一時憤兵戎之未斤經緯乃從而四畧期遵用于已施念絕交離黨之奇實保大定功

之要雖中國四邊之勢振古則然矧真人同軌之模于  
今或未伊焉羌類比此夏疆前世參以金繒成勲未大  
茲地儻能臣妾醜域自平爰命小臣俾據成算不壹戰  
以使之自擾拊大酋以冀其悉來封疆日闢于召公謀  
慮勢均于充國逮幾成于事緒俄小衄于偏裨救敗之  
師不可當戰焉既力出疆之任無所制罪也敢逃兵威  
大振于鬼區職貢訖惟於人面裴度終平于淮蔡蓋一  
定于廟謨段明遂弭于羌戎亦多資于衆力風動遠臨

于青海雷轟自憚于靈旗茲蓋皇帝陛下智勇俱全規模  
素定出奇謀于堂上料狂敵于目中推轂明明旗鼓遂  
從而無敵兵威凜凜心肝爭奉于至尊在臣逃稽緩之  
誅由下靡遺餘之力

擬兩川招安使平李順露布

尚書兵部臣繼恩等言坤維盜弄何勞蠻虱之誅師律  
中行即遂創痍之復迄奠蠶魚之國既安參升之疆用  
寬西顧之憂亟上北門之捷國家鼎來帝運離照鬼區

大一統以同文奄八紘而有截顧維益牧小遠神京然  
深仁厚澤之漸摩與時俱化迺曲見私心之反側動衆  
以言首謀幸厭于天誅脅附更思于扇亂適持節不知  
于撫定致號狐盜遂于張皇城壁屢隳官僚踵戮痛吾  
赤子何忍墮于銛鋒憤爾緣林敢肆行于虐畿皇帝陛下  
赫然出命昭若選才推轂惟專事靡容于掣肘釋囚兼  
用罪惟問于吞舟甚昧愚心敢爭天險屬旗鼓兩明于  
將鉞乃聲威大折于妖徒矧東川素備于金湯蓋巨幹

豈移于螻蟻棧路何虞于來往王師亦務于驅馳雖凶旅  
方興若可游魂而假息逮天威一鼓悉皆授首以摧肝  
電掃無前風行孰禦破竹實三單之快刈鯨無半瞬之  
留錦里依然重被吾皇之雨露雞竿肆及盡還昔日之  
農桑人違黔墨之災罪止渠魁之取雖支黨亦歸于禽  
獻惟衆心本荷于皇明岷峨還徹底之清星宿有倍常  
之潤臣叨膺授鉞每誓捐軀曾何三畧之知常愧六韜  
之學幸賴諸軍畢力羣校協心更由神聖之威獲致纖

毫之效貪天何敢贖罪既多



靈巖集卷二

欽定四庫全書

集部

靈巖集卷三

四

詳校官起居注主事臣顧宗泰

主事臣呂雲棟覆勘

謄錄監生臣程廷璋

謄錄監生臣嚴續曾

欽定四庫全書

靈巖集卷三

宋 唐士恥 撰

檄

擬延州問夏國宥州檄

年月朔日延州問夏國宥州曰蓋聞聖主執賞刑之柄  
烏有所私文告居甲兵之先盡其在我矧君臣之分素  
定且是否之理甚明姑少紓靈旗之威庶不貽裔服之  
禍國家當天五葉享祚百年中國有至仁自然篤近而

舉遠小邦懷其德豈徒厚往而薄來惟明主始初之清明  
在外服奔趨而儼恪夫何一介敢犯多儀固嘗置辨以  
盡其辭乃爾負義而難於對俾之自反敢此無知虔我  
邊陲輒形奮臂屈吾詔旨猶覬革心不獨起飾非之辭  
又妄生歸過之語宜褚衣之輟賜亦正朔之弗班苟有  
人心當知羞惡豈期狼子反欲鴟張肆長蛇封豕之貪  
犯細柳棘門之戍莫解神人之憤兼興夷夏之師射月  
夢開奉頭鼠竄尚從舍垢未欲洗瘢某叨與左符每思

大義擬効枕戈而待旦亦期決射以贏肱馬革裹尸深  
慕古人之勇桑弧垂戶雅知男子之生激烈懦衷蒐羅  
英畧畢起報仇之衆共揚問罪之兵然慮傷天地并容  
之仁姑少忍風雲叱咤之志一興欵語三叩忱辭况旌  
麾亦在於邊陲勢分益形於上下易地而論忘恩者誅  
苟其堅衽草之強將再蹈前車之覆當命營平之將難  
稽鑾邸之刑猶未臻迷復之凶庶可緩成師之出投誠  
儻至洪覆何言

江南西路提點刑獄諭所部檄

年月朔日云云曰兵革藏於私家夫子謂之非禮刀劍賣而勸稼渤海復為平民簡牘所明規繩可尚且習俗有時未正則訓諭於焉當行敢鑿我心少裨爾見維蚩尤之啓兆衆械始基若子產之立言五材並用然人主黜之尚為不可矧庶民藏焉殆未適宜聖有格言戒之在鬪孝之為事夷也不爭耕食鑿飲之餘惟知鼓腹仰事俯育之暇合事學文庶全髮膚勿徇血氣且喜怒實

為難制而暴狠發於無端苟其具之素存必此身之易  
陷大有干於法度小未免於過尤苟念謹身自應買續  
使吾言之不聽當行法以無私然文告之宜先開首科  
而使免儻翻然知過家無鶴膝之儲則坦若安居人有  
龜齡之保矧此多虞之起自夫七札之藏覆轍在前後  
車合戒噬臍莫及蚤計當思皇朝開天覆之仁德政徧  
雲行之澤何獨自貽於伊戚要當遂覺於昨非父兄子  
弟相飭以馴良井里親戚永無於災禍各保賦年之永

同躋比屋之封當職濫奉詔條思防民患不顧言辭之無當力祈仁壽之交修勿自蔽於頑嚚以卒歸於羞辱

陝西轉運使諭橫山部落檄

年月朔日陝西轉運使諭橫山部落曰蓋聞民惟從惠必歸明聖之君命迺敷文斯合典謨之義并期二者形之一言國家超振古之邦開無窮之祚厚澤溢于八表滲漉深仁大度極于九垓包容無外昆蟲至於凱懌草木遂其生全矧在歸誠必敷異渥顧禮義積衣冠之習

而賞罰無毫釐之差凡五葉以百年咸四王而六帝赤  
子舍父母而何德深淵蓋魚鼈之所依此理甚明不言  
可喻橫山番部本從中國偶墮戎疆鼓旗居諸部之先  
戈盾作萬夫之最用之叛渙惜此驍雄矧役服之尚新  
亦風聲之未遠當為反旆是乃首丘况諒祚資稟自狂  
性情率易淫泆無別殊虧謹重之威庸暗喜讒時有偏  
私之聽名稱自侈殺戮不幸雖云蕞爾之邦曷事孱焉  
之主離心自起明見誰先且巴渝亦助於漢師彭濮嘗

從於周后歌舞不替簡冊有光維邊備在我以日修蕃落於今而歲至與其展用於鋒鏑曷若歸心於帝王金犀即賜於昕廷爵祿永膺於明命名姓與史官之紀子孫為樂土之人舍是不圖又將焉取

熙河蘭會經畧使曉諭西蕃邈川首領鄂特凌  
古檄

年月朔日熙河蘭會經畧使告西蕃邈川首領曰蓋聞帝王博愛之仁雖重靈旗之指臣子亂常之罪當嚴齊

斧之誅以其素列於外藩姑爾先施於文告宜及幾微  
之地亟加省察之心國家丕冒普天尊臨截海八方同  
軌獲消烽卧鼓之娛九譯來王極航海梯山之遠維錫  
祚再周於甲子而致平高軼於五三雖專仁義之修不  
廢甲兵之備矧在賞刑之際罔差毫髮之微凡曰剛柔  
曾何吐茹邈川首領夙殫忠尚世長戎邦被純續帶金  
犀每厚鴻臚之賜執干戈衛社稷屢爭靈夏之鋒錫爵  
有加於汝何負爰自襲承之後忽開猖獗之端侵軼邊

疆結連鄰醜將肆窺窬之志莫知覆露之恩昔征嘗欲飛揚卒成困迫此已然之明鑒乃自蹈於覆車識者為之寒心義士聞而扼腕盍從一鼓俾就七禽維兩宮奕忠厚以四漸均中外而同視念玉石俱焚之未免在疾瑕小忍以何傷姑少緩於師徒俾三思於禍咎儻尚知於改易諒不失於拊存事或起於他心頑莫悛於惡子當自明於丹赤母久混於薰蕕竇融致討於隗囂益堅歸漢之志吐蕃助誅於天竺應無背唐之心宜亟厲於

戎昭會大陳於馘獻斃茲叛渙正汝君臣若乃螳怒自  
矜狼貪思逞結憾至仁之主甘心累世之讎兵出萬全  
命定遠營平之將王斯一怒正橐街蠻邸之誅狡穴難  
逃噬臍何及

鄜延路都監報威明山檄

年月朔日鄜延路都監報威明山曰方夏內邊陲外蓋  
克致知見善明用心剛乃臻大道既信義交輸於兩地  
宜死生如在於一舟革故鼎新泰來否往斷之在我展

也有成維仁者無敵之稱嘗畧聞於孟子若異域歸忠  
之傳實備見於唐朝幽谷喬木較然其迥殊鑿齒雕題  
釋爾之可厭徒父子君臣之境服仁義禮樂之風顧不  
韙歟端可尚已矧國家闡聖神之教且政化極撫摩之  
恩奄六幕以無偏殆三王之莫過若甘雨慶雲之覆露  
惟和風麗日之披臨於今寢昌振古弗及用決從違之  
論一明取捨之端釋此不歸悔將焉及威明山人推俊  
傑天稟忠純夙懷向慕之衷蚤啓依投之緒葵傾萬國

之表穎拔四陲之中洎從行慷慨之徒悉自蘊勤拳之  
想書之縑冊而何愧確乎衣冠之是存信使下馳誠言  
俯逮盡出由中之請有孚不肖之心感詠實多戢藏敢  
後竟力踐大丈夫之舉諒無繁兒女子之情朝發穹廬  
夕覘內境金犀蕃錫當立自於昕廷爵祿釀恩亦交來  
於帝所永作中華之胄首霑信使之書罄此有生樂焉  
上國彭濮巴渝之助猶在下風春秋冬夏之行長瞻赫  
日某敢不親提師旅深入疆陲會面有期預喜一斑之

覩承顥不日尚遲踰刺之間努力何言竭心以俟

北路都招討曉諭劉繼元檄

年月朔日北路都招討告劉繼元曰益聞德博威制者廣是名王者之師兵行使在其間要亦古人之義維帝烈皇猷之廣被尚書文車軌之未同忍遽致於大刑用先施於文告蚤回念慮母俾吝尤國家極效漸摩紹休開創訖惟人面畢知職貢之修瞻彼河渭乃緩氛埃之屏還觀五閨並裂四方有古冀都屬茲劉氏顧周室甲

兵之間洎先朝旗鼓之鋒養晦有年推亡不日載念山  
川之割據既賒日月之變更臣子亂常儻非自我天地  
同量以至于今久矣戴盆每焉藏疾仰歎實沈之次俯  
矜恒岳之方尚阻四巡合歸一統矧深仁之及物寧終  
怒於小夫式觀江嶺之降王有耀吳闢之納土同躋一  
視卓冠百王惟是非利害之端在頃刻毫釐之際勢之  
必至理有固然大明當天寧容爝火之不息黑子著面  
誰謂鴻毛之匪輕亟反首以三思毋噬臍於七縱社稷

血食徒爾自文塞外草衰曾謂固蒂何足為狡兔之三窟不當念首狐之一丘隗囂實愧於寶融彭寵何如於耿况當識君臣之大義勿貽今古之深羞其或愚固怙終執迷忘反僥倖不可數得禍福况乎甚明雖聖王推惻隱之心奈師旅厲虔劉之志誠言不再後悔何追

序

禮選序

禮選者諸王府侍講邢昺所上也惟昺通儒碩學究心

禮文之事慨念先王制作其詳不見於世戴聖遺傳粗  
紀孔門之遺學者聚訟尚應討論之功是用筆削以成  
一家迺雍熙四年八月進諸斧依凡二十有一卷聖主  
嗟焉孫謀貽後見於曝書之日召曷同觀帝藻下飾為  
一世榮美貳之縑冊還賜曷家訖藏諸家其不朽也已  
易以卜筮全詩以諷誦全書百篇蓋存者半然帝王大  
綱猶可想見惟是禮樂之事諸儒攷攷補拾不過推士  
禮以想像萬一西京之末大小戴興焉而德所傳未能

粹然也大禹之黻冕仲尼之俎豆空谷足音是將焉屬  
月令明堂位一二附合是殆可畧也禹也皓首窮經紬  
繹之勞殆非常人比緝以為書則上而天子諸侯之所  
依憑大而郊社宗廟之所設張下而至于三百三千皆  
可以無媿用以垂世至于千萬年而不已真贊事也東  
都曹褒因叔孫通之書次序禮事百五十篇李唐魏徵  
作類禮二十卷元行冲又從而疏焉若可比肩是書然  
寢之所祖不純徵之任已自專豈若禹合諸儒之長以

釋不刊之典哉是宜真宗皇帝好善忘勢加之贊述五  
色下被而萬物增華也曷是書世未之見史畧其說然  
獨知其為戴記者蓋禹獻書之辰太宗皇帝取其一篇  
加之聖覽史謂文王世子則為戴聖之書明矣曷之書  
其目則曰分門禮選蓋彪臚有條各從其類之文也所  
上止二十卷一書以為二十一卷豈一卷之目合其數  
乃若是耶是蓋禹書之細愚獨取其千載之下不忘孔  
門之講習游夏之淵源以淑諸來世茲實為醇儒矣

梁文選序

文選者梁昭明太子統所集也。維統心明才通好古。不倦凡百縑冊。既輯既繹。載念辭華之作。由屈騷而下。浩若煙海。雜然並陳。遴擇之功。弗加則黑白甘苦混爾。一區孰取孰舍。雖皓首窮年。曷克殫究。後學來者。何所矜式。是用極耳目之廣盡。權衡之公拔。其尤殊成一編之書。凡三十卷。詔諸不朽不可無述也。二氣綱緼。太和保合。靈而人秀。而文經綸乎。事業發揮乎。天人崇廟間。陳

醇駁互見未易一概言也績學種文之士儻將淹今古而觀之則必有去取焉有褒貶焉有明而無厚也有決而非同也海納川涵蓋所未暇而採摘孔翠拔擢犀象吾亦於其善者而已由屈平以來更秦越漢分裂之邦離合之統上下數百載代不乏人發于情性見之事緒揭為世用形諸筆舌者不知其幾也若大若小或淺或深博若摯虞不過為之流別而已他未暇也統也帝子之英精懋墳典博望名苑聚書幾三萬卷一時俊乂之

流綺羅無遺朝慮夕講孜孜不忘聚古作而耕獵焉討論之力既加薈萃之功益著月異而歲不同以成章告曰賦曰詩曰騷曰七吟詠情性之作四焉曰詔冊曰令曰教曰文上之訓下四焉曰表曰上書曰啓曰彈事曰牘曰奏記下之事上六焉曰書曰移曰檄曰對問曰設論敵以下一往一來者四焉曰辭以陳意曰序以述事曰頌曰贊曰符命以稱美曰史論曰史述曰贊以評議古昔曰論以析理精微曰連珠以駢儼對偶曰箴曰銘

以自儆曰誅曰哀曰碑文曰墓志曰行狀曰弔文曰祭文以厚終始於班孟堅兩都賦終於王僧達祭顏光祿文凡三十有七種而賦詩之體不與焉由梁而上異篇名什往往而在統之志勤矣艷高屈宋香濃班馬而今而後吾知所從事矣音則蕭談僧道淹公孫羅許淹曹憲注則李善公孫羅呂延濟劉良張銑呂向李周翰其訓義日以宣明孟利正卜長福之續文選卜隱之擬文選瞠若乎其學步矣徐堅文府選云乎哉韓愈以文鳴

而高許杜甫實詩人之雄也其訓子乃曰熟精文選理則統也其可間諸選也其可忽諸

神農時令序

神農時令者因穗書而有作也惟神農運膺火德至治純龐昭格休應上黨之山嘉禾八穗知者翕物粲然成文上觀天時爰班明制以前民用丕休哉出治之丕彝三皇之鉅典也三墳久亡間見于韋續字源庸摭初末為之言曰日月之行星辰之運斗杓辨指昏中定次各

有其常不可變易天之開人固如此作訛成易使不失其度生殺予奪使不違厥宜微而車服飲食近而出入起居罔不俾適厥性人之事天者其可忽諸風雨霜露無非至教保合太和必由鉅聖則時令之書詎容無作維犧皇氏首造書契河圖効靈八卦三畫二十有四默象厥氣欽若敬授未極坦明逮于神農運化日開黃桴鼙籥聲樂既闡男耕女織民生不難凡物理之未發者咸將顯著天道聿啓聖心感焉迺因穗書庸班時令

想夫皇謀既定羣臣叶從迺探迺索發揚隱奧克開厥後貽之萬世日行終始八節爰創大火而下五官並建各揚厥職歲終索饗大蜡伊作凡爾百度咸用厥時逮觀大易十三卦之義聚貨懋易迺在日中豈市道必于陽盛之時而後可耶觸類以長事為之制物為之防又可概見矣維耒耜之興肇于斯時神農見號厥尚可探斯因禾瑞爰班茲令意者令所著獨于耕植收斂之際尤詳厥理耶且帝復能相土地之宜燥濕肥硗高下之

別令民知所避就見于淮南子之書仰觀俯察遺諸永久兩全而無闕自非聖人疇能若是耶淮南之書又曰以時嘗穀祀于明堂觀諸後世四堂十二室之制備薦嘗新之法見于呂令之書者殆皆神農之遺耶厥後黃帝當時明天五雲分治丹鳥玄鳥而下分至啓閉罔不釐職陶唐欽天羲和仲叔之掌冠于經端周公時訓月令之目見于汲冢之書非神農舉之于先疇能述之于後耶周官籥章一職專掌春秋逆寒暑之氣俱擊土鼓

夫土鼓者神農之所創也作者之意殆欲後之明天時  
者謹母忘神農之功云謹序

宣和殿博古圖序

有宋八葉天子聰明冠倫密庸萬化之表坐襲垂衣之  
慶海縣鏡清幾務餘閒稽經諏儒之隙每以好古博雅  
為心謂思其人當愛其器雖既更億變多歷年所母庸  
畢見然范鎔不朽之質諒有存者旁搜遠獵孜孜不倦  
鼎來萃聚采久采切天畀地予積日累月既溢乎王府

之藏爛乎祕宇之列帝心悅焉思以警動羣目發揚若  
稽是用肖其體則備厥欵識施諸繪事勒為成書以烜  
耀于億萬年皇乎哉曠世之盛典也敢鋪張帝旨冠諸  
篇首曰高卑既陳書契肇開中古而降文為日詳明聖  
制作物有其則凡厥器用至理所寓母曰粗末不足控  
揣舍是而觀義之精微或幾乎息逮乎兩都世降道夷  
然去古未遠猶有存焉辟之禮失尚求諸野空谷足音  
跫然而喜兑戈和弓垂之竹矢周序炳列和鐘離磬女

媯笙簧寵錫于魯古之聖賢嘉尚若是漢獲故鼎殆非  
九牧貢金所成薦之郊廟聞見歆豔特書大書匪一而  
足豈徒觀美而已哉文獻不足莫甚樂律黃鐘夷則姑  
洗之簾猶足攷其一二况他乎維我熙朝開叔之初五  
緯叶于奎文明之運有開必先區宇既平篤于典藝旁  
逮史籍列聖就將謨訓洋洋振古未見昌期盛際仁義  
四達旁皇洋溢咸五登三閭有軼言維是徃古禮樂之  
具下逮日用未克衷萃鎔範有度銘鏤有義可按可稽

未遂紬繹當是時也聲名四洽年穀屢登爰詔多方乃  
咨乃訪輻輳膺至為品五十有九為數五百二十有七  
曾字禁嚴肆陳彪列參錯典藝玩想不已書之簡冊昔  
人興造之旨固不咸在誠酌古大端升平格典也隆龐  
景鐘相踵有作大亨殷薦視昔罔愧無自而然哉中興  
以來是書祕在冊府小臣竊窺萬一蓋為卷三十叙論  
之畧先禮後樂曰典制曰征伐曰常用曰燕閒抑居其  
次云臣謹序

禹瑞歷序

瑞歷者神禹欽天之書也維禹隆功厚德克膺明顧歷數在躬允繼極治端拱無為百度自彰仰瞻垂象運動有則垂世立法爰紀厥常經緯具舉疾徐無爽列之簡牘以示千億欽崇不朽用承天休名書示意實曰瑞歷其事不具於夏書而荀卿天論獨著其畧敢追裒梗概為之言曰兩儀並立天職洪覆日月星辰罔非至教神聖體之爰建矩則仰察敬奉恪恭不解用以顧諟明命

歛福錫民由來上已周天歷度始自泰帝推分星次黃  
序明民創受河圖重黎有注少昊名官首曰歷正式序  
三辰越在帝嚳下逮陶唐德冠百王羲和厯象殆半堯  
典欽若敬授誠弗可已舜之歷試首齊七政重華協帝  
克紹泰和雖去古既遠書不盡見然其觀象作則前後  
一軌矧維大禹親承治緒襲爵行道烜煥一時欽天之  
書其可無作遠括羲黃近祖陶姚紬繹鳩合克臻大備  
財化輔宜庸以無闕二典三謨與為表裏想夫是厯所

述兩曜聚散五緯疾徐如指諸掌經星常宿維見可觀  
以占則信以攷則明天儀合焉羲和職焉用以垂諸永  
久誠大君盛節治世寶書也洛書千載之期上嫓皇策  
之盛光畀彝倫九疇肆叙箕子傳之數百年之餘武王  
下車汲汲訪問洪範一編光照簡冊五紀歷數實居其  
間然則是書之作蓋本諸天智若行水母意母我曰瑞  
曰厯厥有深旨範其領會而是書其詳者歟矧禹克勤  
于邦櫛風沐雨溝壑之地殖為桑麻魚鱉之民育為衣

冠後人稱九州之廣必曰禹迹蓋功大則萬世不忘禹  
之俯察於地既勤若此則仰觀於天見於是歷者要必  
碩大光明有條不紊與禹貢一書相為上下地平天成  
萬世永賴歸功有自要當不誣孔子答為邦之間首取  
夏時殆亦出於是歷記禮者叙夫子之言杞不足徵吾  
得夏時釋者以為夏小正果聖人意哉禹之行已儉於  
欲勤於德畧於私厚於公非食而致孝惡服而美冕其  
奉若天道者殆詳且悉也後世羲和廢職至勤嗣侯之

干戈足以見典刑之尚存稽諸漢志七畧之目天文一家禹書不少見獨有夏厯冠殷周魯之先今書不存無能識其梗概云

帝學序

帝學一書乃元祐五年侍講范祖禹所上也維祖禹純儒碩學究心致主之術謂夫尊臨六幕統理萬幾自非講習古初不忘龜鑑曷臻盡善之域是用稽參前牒萃合往行上繇晝易之日近底元豐之年凡宸心緝熙經

幄紬繹之故悉歸會輯為書八卷寘之淵宸用宏端緒  
日新益明之理舍是殆無他歧厥旨深矣有天資有人  
力或有愧焉必歉然于中要使人力足以濟其天資則  
乾坤無不全之功神聖有蔑加之德今夫一介之士不  
敢自棄自急必思夫修省之方琢磨之術以無艱乎降  
衷之善受中之粹矧夫居四海之上為萬乘之尊予奪  
自我維持自我舉一政可以厚八紘修一德可以倡萬  
姓其可釋師古之道去正心之理以一聽之天哉此帝

學之書不可不作也上考古昔由伏羲以來書契以降  
孰不以學為先務堯舜禹相踵而作語其德一曰稽古  
二曰稽古形之典謨垂為軌範皆學力也文武並興百  
年一轍播之雅頌亦學力也從漢而降猶是物爾惟我  
本朝累聖相承崇儒尊經超軼近古盛治所就奚止四  
三王而六五帝哉惟我哲宗皇帝接千歲之統膺鼎來  
之年自修切磨之道舍學將安取哉祖禹獲侍經帷夙  
夕孜孜謂無以開萬里之塗則燕轍越旆莫知所適一

木之本不正則他日之厚薄纖宏殆未可知也職在太  
史縑冊之存可稽也責在進德古昔之善可舉也吾非  
侵官而離局也吾非強聒以自誇也事當其宜而言有  
其要也且一言可也而至於八卷之博祖禹之心切矣  
說命有篇敬之有什商宗周后用以立德用以保治時  
祖禹之書一轍也祖禹蓋嘗輯仁皇之懿法以為訓典一  
書又嘗預司馬光通鑑之編二者足以明烈祖監美惡  
有補一時有補來者蓋不止帝學一書而已然而帝學

獨能開端倪澄其源正其本使不哆不異後世之君苟知所以尊用崇信以兢兢業業日昃夜分以深察吾心博觀物理參之前言往行淑夫一身淑夫天下後世其用可勝殫哉其盛可容言哉夫洙泗相與漸摩不一而足魯語一書成於門弟子獨以學習冠篇蓋聖門正傳必自是始祖禹具有以胎合也夫

太平廣記序

臣仰惟太宗皇帝嗣興幼之運混文軌之宇治協登成

業懋稽古爰詔儒紳采獲昔人稗官之篇條分臚析爛然有第凡五百卷藏之祕館制作之道宏矣學尚乎博聞貴乎詁不讀山海經畢鸞何以辨不熟爾雅幾為勸學誤一陋一洽得失較若書可無作乎曰典藝粲然易之幽書之明詩之雍春秋之肅學之道訖已歷年牒猶曰治亂之別成敗之殊釋是括九流下騷問尚遠而不即廢而不攻况百家之細乎致遠恐泥明戒凜凜維日不足我則未暇儒者類以末為諱以不正為譏博極羣書

旁通百工之學卒蔽大人之賦已事前轍可不鑒哉曰  
是一曲之說非達觀之見也蓋自乾元四部以來唐政  
不支凶祲妖氛播于太紫之上大京衆師金湯屢隳牙  
籤散亂之簡不越而之四方則莽在泥塗國史不克全  
况他乎重以末造之禍極之五閨之變芸香牢落竹帛  
土苴誰復念之干戈鋒鏑之餘天厭塗炭真人挺生鋒  
旗四焱罔不臣妾孟蜀江左之掃除舟車聿來冊府以  
充雖投戈疇隙絕亡馬上治天下之想煜煜奎躔下闕

圖書萃于五緯搜遺有詔獻書有賞表著方冊炳炳若丹以舜嗣堯重華有光三館翬飛崇文標記中屹傑閣雲章昭回傾還石渠東觀之舊文風日起御覽一編千門萬戶包總細微咸曰周叙英華踵作囊括後先流別井然若延萬士哉冠切論皆前所未見猶嫌聖心益曰洪造無垠變動惚恍殊異之象時出間見使無以昭明之則駭溢元元將有禹鼎未鑄之患彼芻蕘一言日表晏溫不以為鄙而慢之也况宇宙之宏編帙之繁耳目

所不接忽而陋之不幾以常而廢變守一而忘百乎五  
石之隕恒星之如雨格諸降莘言晉之故左氏不為誣  
矣故自虞初以降千端億緒或是或否若信若詭有不  
暇論也若大宛之馬驪黃牝牡雜然具存不惟汗血之  
駒也若大秦之珍瑟琉璃渠珊瑚並舉不惟尺璧之取  
也大矣夫有六經為之正有廣記為之變括洪荒而無  
外秉仁義而不惑吾道之終乎極千古之醇武成惟二  
三策竟萬物之動九鼎用知神姦來者克明則皇心萬

一愚言不為誣矣臣謹序



靈巖集卷三考證

第九頁後六行 魏徵原本徵作證因避宋諱今改正

十二頁前五行 道淹原本訛作道該今改正

金匱要略

卷三